



11. juli 2006

Inatsisartut Suleriaasiannik § 36 imm. 1 naapertorlugu matumuuna Naalakkersuisunut imaattunik apeqqutissaqarpunga:

**Naalakkersuisut siulittaasuannut apeqqut: Takuuk ataaniittoq**  
(Inatsisartunut ilaasortaq Per Berthelsen, Demokraatit)

**Asasara Hans Enoksen,**

Ulloq 6. juli 2006-imi akissuteqaatinnut qujanarsuaq. Arlalitsigut peqquteqartumik akissutit (imaluunniit akissutinni amigaataasut) eqqumiigaakka. Aappaattut ilinniartitaanermut kultureqarnermullu naalakkersuisuit apeqqutikka akissuteqarfiginngilluinnarpai - allaat apeqqutit piviusut akinagit. Akiuminarluinnaraluarput. Tulliattut apeqqutaangilaq politikikkut qanoq isumaqatigiinngitsiginersugut apeqqutaangilaq (qularnangilluinnartumik taamaappugut), naalakkersuisunulli ilaasortap qulaani taaneqartup apeqquteqarfigisaminik akissuteqartannginnera.

Malugeqquara Inatsisartut Naalakkersuisut sulisitsisorimmagit, pissusissamisuussagaluarporlu Inatsisartunut ilaasortat apeqquteqaataat Naalakkersuisut torersumik akisartuuppatigik. Nunatsinni oqartussaaqatigiinnerup atuunnerata siuarsaatiginavi-angilaa Naalakkersuisut suliaminnik pimoorussinngippata. Demokraatiip tunngaviisa ilagaat naalakkersuinikkut suliallit illuatungiliuttut (ikinnerussuteqartut) apeqquteqartarnermikku naalakkersuisut qanoq iliuuseqartarneri nakkutigisinnaanerat. Tunngavik taman-na Naalakkersuisut asissussanngilaat akissuterpasuarunik asuleertunik saqqummiussisarnermikku, ajunnginnerugaangamik soqutaangitsut, ajorneraagaangatalu pingaakujunnertut akuersornangilluinnartutullu taaneqapajaarsinnaallutik.

Isummersimagavit apeqqutit naammaginartumik akineqartartut, apeqqutit ataaniittut akinissaat ilinnut ajornaassapput:

1. Ilinniartitaanermut kultureqarnermullu naalakkersuisup eqqarsaatigisarsimassavaa sulisut ataasiakkaat kalaallisut paasisinnaalissagunik qanoq amerlatigisunik pikkorissartinneqartassanersut. Ilisimalluarpara sulisut oqaatsitigut piginnaasaqalersinnaasaat assigiinngitsuusoq. Taamaattorli oqaatsitigut kalaallisut piginnaalissagunik pikkorissarnerit ikinnerpaamik qanoq amerlatigissanersut ikinnerpaaffeqartari-aqarput.



2. Pikkorissareerunik suliat suut isumagissaneraat pillugu Ilinniartitaanermut kultureqarnermullu naalakkersuisoq qanoq naatsorsuutigisaqarpa?
3. Sulisut qallunaatut oqaasillit amerlanersaat kalaallisut ilikkarnissaasa tungaannut piffissaq qanoq sivisutigisoq ator-neqassanersoq ilinniartitaanermut kultureqarnermullu naalakkersuisup eqqarsaatigaa?
4. Sulisut qallunaatut oqaasillit qanoq amerlatigisut (sulisut qallunaatut oqaasillit tamarmiusunit) ukioq manna oqaatsinik pikkorissartinneqassapat?

Kalaallit oqaasiinik piginnaasaqalernissamut tunngatillugu apeqquterujussuit tulleraat oqaatsinik pikkorissarnermik akornanni oqaatsit nalunartut qanoq atortassaneraat. Ilisimaneqarpormi kalaallit marluinnik oqaasillit inuit qallunaatut isikkoqaraangata qallunaatut oqaluuttarneri, taakkulu marluit Nuummi minnerunngitsumillu Namminersornerusuni amerlalluinnarput. Tamarmik isumaqatigiissutigigunarpaat ulluinnarni atortangikkaanni oqaatsinik aalajangersimasunik oqalussinnaaneq pikkorissisoqarnaviangitsoq.

5. Ilinniartitaanermut kultureqarnermullu naalakkersuisup eqqarsaatigisimanerlugu sulisut qallunaatut oqaasillit kalaallisut pikkorissarsimasut qanoq ililllutik kalaallisut oqaatsitik ulluinnarni atortassaneraat?
6. Tulliatut paaserusuppara sulisut qallunaatut oqaasillit kalaallisut ilinniartinneqarnissaannut aporfissat annersarinerat ilinniartitaanermut kultureqarnermullu naalakkersuisup qanoq isumaqarfigineraa?
7. Sulisut qallunaatut oqaasillit, kalaallit oqaasiinik pinngitsaaliusarlugit pikkorissarteqattaarnissartik qanoq isumaqarfigineraat pillugu Ilinniartitaanermut kultureqarnermullu naalakkersuisup misissortissimanerpaa? Misissuisitsisoqarsimappat misissuisimaneq akissuteqarnermi ilanngunneqarnissaa kissaatigaara.
8. Sulisut taaneqartut kalaallisut ilinniarnissaanni suliniuteqarneq pitsanngorsarniarlugu immikkut sammisassanik aallartitsinissaq ilinniartitaanermut kultureqarnermullu naalakkersuisup eqqarsaatigisimanerpaa?

Tulliatut ilinniartitaanermut kultureqarnermullu naalakkersuisup akissuteqarnermini siunniussat arlallit allattorsimavai, soorlu kalaallit ilinniarluarsimasut qallunaanit ilinniarluarsimasunit salliutinneqartassasut il.il. Tamanna nutaartaqanngilaq. Taamaaliortoqartuarsimavoq, assersuutigalugu periarfissaqaraangat kalaaleq ilinniarluarsimasoq qallunaamit salliutinneqartarluni.

9. Ilegqutoqqamut naleqqiullugu nutaartaa sumiippa?



**DEMOKRAATIT**  
DEMOKRATERNE

Akissutissatit qilanaaraakka, tigoreersimanissaalu kissaatigaara kingusinnerpaamik 25. juli 2006 nalunaaqutaq 12.00. Apeqqutit ataasiakkaarlugit akineqarnissaat piumasarineqarpoq.

Inussiarnersumik inuulluaqqusillunga

Per Berthelsen, inatsisartunut ilaasortaq  
Demokraatit